


181
:6



槐塘詩稿卷十三

錢塘汪沆西顥著

竹裏館集

上

小園有地數弓築屋數椽繞屋栽竹數百竿顏曰
竹裏館聊蔽風雨匪敢媲美輞川也主人返櫂竹
西伏處其內綠陰滿案得酒卽飲飲罷輒吟雖無
登高望遠之樂而畱連光景懷人感舊亦足自適
自己丑迄於丙申得詩約三百餘首釐爲三卷編
是集而以所居名之俾我後人勿忘此敝廬可也
甘墩村看桃花用梅宛陵和楊直講夾竹花圖

清明乍過簷柳綠廓處書堂類空谷嬉春久息少年心
 咫尺暗門禁兩足時寓水溝巷李家表弟慰我老邀我看花
 簡一幅野航扶上蹇蹇翁小港沿緣入九曲花光夾岸
 望不通誰道漫山總粗俗半生我苦羈異縣纔喜今年
 復邦族此間種植足生計擬學將花課童僕茅宇三間
 田十雙不貪負郭千金鬻朝舖軟嚼桃花飯夕煨香煮
 桃花粥每逢花發載酒遊長對青山展畫軸不知奢望
 幾時酬今朝且騁花前目

蓮居菴脩禊再用前韻同董浦妙峯西林甌亭

魚亭小谷雲溪作

積雨乍晴汀草綠有約宗雷入香谷水嬉興嬾問湖濱
 連襪城東訪白足當門老樹剩枯幹倚壁舊碑畱斷幅
 昔遊彷彿不記年莎徑苔堦迷幾曲琉璃地滑結淨緣
 一詠一觴屏凡俗平生禪悅性亦耽排斥何論非我族
 文殊不二無語言祇怪三乘數更僕冰牀雪被讓高眠
 豎拂拈槌莫銜鬻妙峯西林竝精禪理時妙峯寓菴中六時香共消篆盤
 一箸味同煨杏粥永和人物久消沉徒傳禊帖書牙軸
 不妨作達樂佳辰俯仰千秋鳥過目

雙松圖爲余松巖大令題

阿翁親植兩壩松虬枝移自天都峯手澤猶存翁化鶴
對松如對翁音容計偕遠上長安道翠鬣森森夢魂繞
掃障今雖乏畢宏揮毫幸得傳張璪由來孝子念析薪
雙松都作老龍鱗梁棟之材克負荷不改貞柯看致身
請君尺幘添慈竹岬岬陟時同在目縹囊什襲慎收藏
孝思永爲雲初勛

題玉屏詞集

情多何處不移情嚼徵咀宮緩倚聲試擬前賢細評泊
史邦卿外柳耆卿

化鶴遼東十五春將車撰杖悵無因今朝制淚看遺墨

輸爾清才作替人

詞爲樊榭
師點定

登岱圖爲張蓀田題

人生學業期崇高望岫息心功徒勞寰區五岳首泰岱
譬彼六經聳岌堯喜君讀書破萬卷拾級丹梯不知倦
天門蕩蕩遵大道下視培塿豈回眩七十二君封禪文
荒唐往牒不足云一凌日觀豁蒙矜孔思周情尊所聞
方今稽古羅英雋禽向之蹤莫輕趁好將經術致昇平
蓬山振翮翔千仞

送廣齋赴忠州

彝陵曾鼓櫂西望接忠州赤甲劍鐔轟黃牛竹箭流會

看馳草檄莫便賦登樓陸相多遺愛圖經次第搜

漫興四首和董浦韻

捷足輸他下坂輪放懷亦復賞餘春拓窗竹徑延新綠
策杖花汀招故人萬事因循難鑄錯百年骯髒豈愁貧
尚畱豪氣依然在鬪取尊前磊落身

空腸終日轉車輪二老隨肩又一春鑑閣縹緗香觸手
桂堂池館靜宜人但期無事常相見肯說衰年一例貧
北米南柴翔市價

杭州舊諺南門柴北門米見二老堂雜識

當餐獨愧不畊身

半生辛苦役蹄輪鶯老花殘非我春歲月無情如過鳥

湖山有分屬閒人書思誤字差堪適苔已成錢不算貧

自問久無哀樂感杜門且養不才身

曾逐詞場老斲輪雲根園裏餞殘春聯成鏗鞳曾吟句
座盡欹欹歷落人一咏一觴堪送老有花有酒未全貧
綠陰取次將成幄水榭風軒合真身

問魚亭足疾和甌亭韻

聞道端居夙疾櫻蹒跚竟廢下堂行高眠且復償詩債
近局全疎鬪酒兵乍蹇君非習鑿齒將盲我懼左邱明
何緣能視兼能履煩惱蠲除無畏城

趙淨名過竹裏館話舊

柳塘詩稿 卷十三
半生踪跡笑冬烘冷逼園林凍未融舊雨喜來晴雪外
孤懷淡對濁醪中紛紛過眼辭條葉寂寂藏身避弋鴻
磬弟梅兄清有味與君且忍北宮窮

題丁誠叔遺照

憶從送別金華去炊黍流光判死生裴秀至今推領袖
大千太息殫科名鶴歸華表空畱影楓落秋原颺有聲
半畝幽宮還未築爲君老泪灑縱橫

酒旗

一竿斜曳傍晴原遠望飛飛燕影翻楊柳陰中知野店
杏花風裏認前村不如來飲扶筇健何處難忘畫壁痕

多謝招邀竹林侶黃公壚畔幾人存

傷亡友麟徵曦亮
聖基諸酒人也

喜張雨村還武林

相別不知歲重逢驚老蒼音塵疎短札生計各他鄉太
息春如駛何堪客促裝爲酬燒筍約款款話離堂

詩才推大雅棗木早流傳每拄赤城杖高吟白雪篇侍

郎今宿草伯氏隔重泉

息園宗伯家眉洲
兄俱爲雨村故交

不待山陽笛

知君共泣然

匝月南屏住清遊向客誇時攜一尊酒看徧兩堤花洵

美是吾土翻嫌輕去家能文羨驥子稻種辨瑯琊

時令
其長

公子讀書
小眠齋

鬼唐詩高

卷十三 竹裏館集上

五

寄示姪彭壽

負米三山去辭家六月餘老懷增悵望遠道滯音書須
解分陰惜無將舊學疎韓公有遺句經訓乃菑畬
一紙因風寄休勞念乃翁歡悰隨處得顏狀別時同細
字把猶讀深杯吸每空近來腰脚健卻杖上穹窿

春暮艮園雜咏二十首

春眠近識幽慵味紅日烘窗目尚瞑盥水已來人掃地
曹騰一覺夢初醒
花氣熏人破午晴堆床書帙任縱橫老夫飽飯無他事
靜聽微風動竹聲

手種薔薇與木香十年孤負住他鄉今朝償取看花債
驥子鴻妻舉一觴

熏爐茗椀結因緣寂歷空堂思悄然忽啓園扉驚鵲起

沈郎來約上湖船沈秀才炳季

湘東一目渺愁予不忍牙籤飽蠹魚捲起疎簾邀日影
巾箱本檢舊鈔書

故人昨日到杭州對筍嫩芹香一宿畱細數天涯舊遊

侶生存大半雪盈頭

好友昨貽黃菊枕秋田阿兄又送洗頭盆柯山三兄以從桑木盆見贈

今排日看山去不怕光搖銀海昏

畫棟營巢燕子愁銜泥來往語啾啾我生但乞身無事
屋小何嫌低打頭

膝下雛孫列雁行挽鬚問字夜來忙半酣漸入蘧蘧夢
夢裏書聲喧隔廂

論包買得早春茶輸與旗槍綠雪芽也有色香還有味
頭綱八餅任人誇

背手行吟過短籬小園却值筍抽時呼童斲取金鴉觜
正好荒廚供午炊

黃紫何須較魏姚花開便合酒杯澆不嫌眼福朝朝飽
難得名園處處招

穀雨前後屢
赴牡丹之會

綠陰滿徑靜悄悄盡日無人到竹林回憶卅年前後事

閒中日月抵兼金

團團雙桂倚虛檐想到花時香撲簾種樹十年真得計
風軒洗學待涼蟾

疎疎細雨濕蒼苔尚有餘芳幾朵開自向堦前理花架
一雙蛺蝶掠襟來

欹斜字跡笑難堪為謝知交少報函惟有家書牽率我
封題上海又閩南

登盤糟鴨肥於豸出網鮓魚白似銀咬得菜根家有訓
慚將口腹累交親

甌亭默齋
分餉二物

輕雲薄日餞春餘寂寂寥寥揚子居却怪閒人有忙事
借書未了又還書

曲磴同登引勝亭隔江快出越山青書坊更爲尋陳起
借得胡床一餉停

筮得兼山第一爻芥舟真合處堂坳而今息影棲蒿徑
不用旁人作解嘲

西顛兄以所作良園雜咏二十首寄質夫於
津門蓋寫其里居閒適之趣也質夫函以寄
余未及封還而質夫北去暇日展誦不禁愉

戚交至

師韓上湖

一箋詩卷見遊遨千里音沈想鬱陶增病亦畱治病
藥平分客感笑號咷

病足

雙踵忽遭病作楚逾瘡痕空堂跂脚臥如痿竟難起杜
門少人過差免塵事累靜觀進退機默悟顛躓理危途
詎可蹈邪徑當知恥攀援強升高召蹶不知止黽勉讀
書功十駕期百里

哭吳氏姪女

有生必有死死亦理之常惟有骨肉親沉痛煎肝腸汝
父遺女五三五蚤夭殤大姊癆瘵卒四妹沒阜陽畱汝

一弱息春蘭殿餘芳作嬪延陵子文采挺圭璋竹筥與
練裙不恥嫁時妝何期失所天寡絲彈孤凰有子剛十
齡有女十一強含悽勤教育冀答所天望前年邁肺疾
值我歸金閨強笑啓我顏飲食坐我旁三旬得安穀又
復別汝行叶寄書必問訊粗糲時附將詭辭體已瘥紅
箋報短章去冬十一月入門乍卸裝聞汝病增劇我心
驟驚惶急走豐禾巷扱衣上梯枕汝聲訝漸瘖汝面瘦
且黃丁寧戒勿藥亦莫事禱禳授以靜攝術安心更無
方二豎抑何酷荏苒入膏肓昨者來視汝伏枕泪含睚
攢眉指咽痛對食不得嘗上言負阿翁無復事高堂又

言孀母邁乳哺恩難償中間語覩縷念弟客遠鄉弟歸
致女辭莫爲女惻愴阿叔勿憶女女命葉悴霜執手不
放手掩面骨支床我雖好言慰我心痛刺芒今朝天中
節苦雨報汝亡汝母痛幾絕汝孀號在房我泪滴欲枯
矯首問彼蒼智慧命何促愚瞽算何長懍恍隱几臥有
神語頗詳謂君誦聖籍曷勿自忖量不見王侯貴荒榛
纏石羊不見猗頓富遞送埋北邙顏跖同所歸悲風吹
白楊君女洵賢淑天豈有意戕婚嫁事粗了中壽奚盡
傷矧君迫崦嵫行就夜壑藏百年能幾人日月轉燭忙
慎毋過時戚太上情必忘語罷歛然逝簷溜鳴浪浪寤

起爲雪涕餘哀斥蒲觴

姪彭壽自閩歸

前月得汝書望日歸裝束閩海我夙遊計程二旬足如
何竟愆期使我攪心曲得毋末疾櫻抑或舟石觸空腸
轉車輪傾耳聽剝啄

望歸汝已歸懽笑到童穉牀下止汝拜喜極翻拭淚東
家兒作宰西舍子及第富貴豈不好樂事門內始叢菊
晚尚香修篁冷逾翠素業守一經家聲慎毋墜

嗟汝少孤露襁褓嗣汝伯所後母聖善顧復到頭白今
開七袞筵歸及上壽夕篋中獻新衣光鮮來洋舶尊中

薦荔醞芬芳溢重席鞠脰阿母前慈顏大愉懌

秋草四首和梁兼士孝廉韻

極目平蕪減綠痕西風茂苑黯銷魂欺人青女工相妒
失路王孫忍更論小雨沾濡非舊徑輕塵棲托怨孤根
眼前生意差堪幸折葦枯荷那得存

曾記鶯花三月天萋萋也傷玉階前宮袍照日薰相映
書帶迎風晚更妍鸚鵡洲邊迷畫舫金牛湖畔引香鞵
而今一抹斜陽外憔悴何堪竟隔年

踪跡重尋南浦橋流光難挽踏青朝上山誰復薜蘿采
掠地生憎鷹隼驕甘向冰霜埋屐齒恥隨兒女鬪裙腰

榮枯省識原前定敢怨驚蓬萬里飄

又聽鷓鴣動愁思病葉蕭條半墮枝覓句池塘成噩夢

敲砧門巷掩涼颼一亭畱取乾坤在大野還看雨露滋

原上離離休悵望東皇旋轉本無私

題柴嶼青給諫習射圖

蔚矣青瑣彥揆奮材兼資奉

命赴陪京驄馬凌霜馳百年生聚久要貴培其基封事

十數上仰荷

皇天慈報可不稽日一一令甲施緬惟侍御公荷戈此

棲遲艱難述祖德詎敢耽晏私春風闢射堂雲朔集羣

兒訓以子臣鵠審固三發之恭逢

大化洽王會朝九夷烽烟靖候尉萬里咸熙熙我聞為

政者決拾理可推張弛自有道屈伸自有規首在正厥

志中節罔不宜斯圖習勤意詎惟弓冶垂願言告有位

居安毋忘危

謝王璞完惠香魚

舊錫佳名記月魚

歐江逸志香魚月長一寸因名記月魚

比將丙穴美堪

如分嘗竹館明鐙底記噉榕城小雪初

福寧府亦產此魚十月甫得

斫去鸞刀難作鱠烹來錦字已無書獨憐雋味豐廚少

一段清芬剔齒餘

附

介壽

香魚產甌江形類鯨在藻出網蘸碧油水屬翻就燥
 朱門遠羅致嗜好異懷抱腥盤膩鼎閒愛鱸不愛藁
 遺餉及馮驩一卮佐清醪手先剝其膚碎屑盈几埽
 入口嚼蠟同繼如蟲齧蓼含咀到樽空舌本餘甘繞
 迺知回味佳所貴漸搜討寄言肉食人應悔麾棄早

題江雲溪小齊雲山圖

新安大好稱山水我家舊住槐塘里昔年省墓還故山
 西望齊雲山尺咫青鞋布襪未暇遊漁梁渡口促孤舟
 惟向圖經識山面空懷把袖從浮邱玉屏山人仙骨超

卜居山側離塵囂飢來忽驅出岫去時時清夢凌山椒

為倩陳翁寫立幅圖為陳楞山作千峰萬峰雲一族白衣蒼狗

變紛紛嬾上揚州說騎鶴竭來寄跡枯樹灣天香連理

館三間寓中楣額門前靜聽柔櫓過樹上閒看飛鳥還山人

樂府妙無匹有井水處歌藉藉酒酣頻唱思歸引茅屋

石田真可惜小齊雲接大齊雲飄飄來往雲中君一程

雲隔願分占相約同尋鸞鶴羣

贈楊謙山比部卽次簪花閣春夜聽雨原韻

一帆來自闔閭城正值黃梅水乍生筆旨墨詮囊不少

竹苞松茂宅初更時移居對門揮毫舊判仙曹牘走馬曾聽

上苑鶯今日簪花高閣上鳳城回首不勝情

何須得失問蟲雞陶鑄羣英徧浙西四世三公青史著
盧前王後大名齊叩鐘教術推三就負笈生徒解六迷
亦欲相從析疑義雨街不憚屐衝泥

題胡褐公金陵二十四景畫冊

金粉何須說六朝江山如此霸圖銷也知花信風吹過
不忍丹青著色描

竹裏館雜咏

曉日穿竹罅照我讀書堂清風忽搖颺竹影紛低昂起
行入竹徑殘露滴我裳羣鳥鳴其顛似矜棲枝涼舊竹

日以少新竹日以長悟茲消息理胡不廣樂方

湘簾垂一桁瓶荷半已舒寂處愴無事遊心羲皇初所
媿飽食嬉強起曝叢書巨編雁行排小冊鱗次如子孫
未能讀聊免供蠹魚入門復出門俯身循階除汗浹我
不惜田父方揮鋤

憶昔炎夏候因人賦遠遊北驅燕齊道南入高雷州赤
曦勢爍石望蔭不得休勺水帝臺漿黃塵撲馬頭今茲
一畝宮可誇千戶侯勞逸境何常惟人審所謀

閏七夕甌亭招集雲根園以病未與賦此奉簡
井梧蕭瑟涼風至綺節重逢修故事香車彷彿待鵲橋

玉佩依稀整龍轡煮菱剝芡籩有加月榭雲廊坐無次
 病夫寂寞守藥鑰羣彥幽閒競鼓吹時會者十二人各有詩負燒
 銀燭臥同看翻繫匏瓜笑如避流傳風俗半荒唐假借
 癡兒作遊戲乞願虛聞崔寔書合歡妄撰齊諧記雙星
 萬古永相望一語真堪醒世醉

王澹和上舍沒逾半載其子憲度出蓮峯種松

圖索題為賦長歌以紀其實

蓮花峯上千樹松昂霄聳壑護幽宮當年孝子手親植
 天寒颯颯含悲風我友秉質醇且懋三德六行世妙觀
 為營窀穸安先靈辛苦芒鞋萬山走葱葱鬱鬱得佳城

髣髴生前荷鍤行澆酒更無林鹿觸反哺惟聽夜鳥鳴
 嗚呼成都種桑八百株衡陽種橘千頭奴何如此松種
 成傍丙舍三鬣五鬣翠色相盤紆

鑿石謠

朝鑿石南山山脊白於雪暮鑿石北山山坳陷百尺兩
 山之下墓纍纍新鬼含怨故鬼悲試問鑿石何所為盜
 疊假山官不知城外之墓家家有鑿石不休痛疾首誰
 與大書深刻禁穹碑賴有良二千石鄒太守公名應元無錫人守

杭甫八月調任
臺灣府而去

紀事 有序

嚴氏仁和民輝遠女也輝遠業賈素與湖郡邱某善嘗受邱惠遂以其女許配其子天柱輝遠妻同里徐媪女早歿女弱歲養育於媪家逾年邱某死家落輝遠悔焉謀鬻女於富家某爲妾告媪媪勿許輝遠率羣小至媪家思劫女去媪急奔訴於邑令高公公逮輝遠并女與天柱鞫於庭時方寒冱天柱短衣敝履匍伏堦下公指天柱顧女曰邱郎貧至此若縱歸何能活而違父命耶女泣曰身業許邱何厭貧爲父必改字有抱母栗主死於井耳公笑曰吾試若若勿疑乃命成禮於堂上出衣襦

簪珥之屬畀之天柱亦易服煥焉一新又以己之儀從輿服遣胥吏送歸觀者填溢道路明日天柱偕女詣公謝公厚有所給爲謀食計公自賦紀之予友何琪爲紀其事爰撰古詩一章旣以頌公之善政亦嘉女之志也公名模字彥範山東歷城縣人

嚴家有賢女貞靜無天斜齟齬痛失母孱軀棄阿爺寄食老嫗徐實惟外王母十四工烹飪十六工刺繡阿爺嘗苦飢交友茗之湄受德良不薄字女邱翁兒歲序有寒燠人事多倚伏翁死邱郎貧阿爺心反覆走告外王

母我女好姿首不如嫁金夫免作窶人婦女聞阿爺言
血淚泉迸出鍊石矢勿渝強暴轟入室媪急奔訴官庭
鞫霜風酸邱郎氣噤瘁襤褸衣不完縣官試語女在家
宜從父良人仰終身邱郎莫庇汝抗聲禮經訓婦人義
從一反顏事二姓胥井吾命畢縣官大歡喜前言吾戲
耳女也飾釵鎗男也易衣履俸錢助一囊結褵拜公堂
蹇修縣官作聚觀如堵墻輿從導之歸夾道生光輝隣
人造門賀感激生獻欵我聞

聖世教

王化始閨門風聲樹坊表婚姻罔瀆倫矢歌成此章用

備輶軒採願繼韋丹碑仁和高茂宰

雨夜得孫補山侍讀老官屯軍營來詩依韻和
之

沉沉夜雨照油檠一紙書來萬里程漫說馬卿徒喜賦
須知韓愈亦從兵鼓聲聲裏飛書捷矢石叢中躍馬行
蠻長壺漿迎夾道凱歌撰罷槩斜橫

姚躋堂明府招同胡桐峯陳摩邨姚素山集湖

上就莊時遇張看雲徵士寓漱石居遂邀同遊
久晴頗望雨積雨又望晴匪徒阻遊屐民食殊關情姚
侯有嘉招盥罷鼓勇行不晴復不雨出郭雙眼明舒舒

木杪言和 卷十三
風稜軟薄薄雲葉輕重重堤樹暗晶晶湖水盈竝坐接
笑言求友聽嚶鳴

別墅瀕湖壩飛翠落檻前入門數叢花照池影娟娟因
山架層宇樓閣參差連垂老重一到感舊增悽然憶昔

泛秋夜月黑忘迴船

雍正丙午七月桐鄉朱霞山上舍寓就莊招同夜泛今四十餘年矣

良友久黃土人壽疇百年春光掉頭去倚闌思綿綿

吳江張徵士工畫世共寶竭來湖上住幽遐資探討南
山茶細啜西溪筍飫飽爲言平生遊無如西湖好我病
久不出竊恐山林惱今日攬君袂乞君畱畫稿後會知
何地莫辭玉瓶倒

湖中饒名園幽蒨離塵垢臺榭抱逶迤樹石競明秀到
處足勾畱欲去每回首閒者卽主人何必非我有移櫂
湖心亭愛茲踈地柳遠山列修眉騁目延佇久默契智
仁理不在接杯酒願言謝塵纓烟波作釣叟

浴佛日雨後張青田招集祇園菴同董浦無夜

楊二農龔深甫作

傍城幽處結靈林路轉蔬畦屐齒深望裏濕雲低未斂
坐來新綠密相侵雪山成道傳今日貝葉繙經負夙心
願借軍持功德水五香分灑滌塵襟

閏五月初伏雲溪自邗江至集翠玲瓏館是日

鮑以文得宋刻李雁湖王荆公詩註殘本卽用
其集中贈彭器資韻

膽瓶荷花水新注涼風一榻愜予慕故人單舸渡江來
三五鷗尋舊盟處幽廊曲榭屋三閒門前襜褕斷往還
凌空瘦石皴苔蘚弄影叢篁蹙翠瀾古香入手疑宋槧
何期舊本畱人寰傳觀四座不釋手後夜相思欲別難
贈秀峯弟四十初度寓規於頌竊取古人之誼
也

我年六十四君今四十強衰老我不懼所懼學殖荒羨
君保先業束髮事文章力祛膏粱習結交多老蒼聚書
十萬卷四部紛琳瑯築樓高貯之臨風誦琅琅佳境易
遭妒俗士橫謗傷不平不得鳴三日臥匡牀昨朝訴鬱
悒觸熱登我堂我有一言告芻蕘慎莫忘寡交事可息
能施名自揚有容德乃大作善天降祥微言在六經探
討理本常力行苟不倦期頤壽且康勿蹈我之轍追悔
秉燭光

槐塘詩稿卷十三終

槐塘詩稿卷十四

錢塘汪沆西顥著

竹裏館集

中

題桑叟甫續高山流水圖

禾中朱苧塍沈似笠兩翁先畫有高山流水圖嗣
叟甫與苧塍之子子齋交稱莫逆子齋旣歿張瓜
田續爲此圖蓋以叟甫爲牙生而鍾期於子齋也
叟甫亦歸道山其姪公備出此圖索題

憶昔與君交荏苒四十年人琴今俱已思之淚漣漣阿
咸示我圖玉貌宛生前君交鶴洲翁心期金石堅一朝

歸山邱作圖繼前賢知音良獨難寓意託朱絃拂軫不
忍彈極目睇海天此意厲末俗此情達重泉不須問虧
成撫卷心愴然

試鐙夜顧涑園招集梅花世界看花聽歌同願
圃百藥松巖潘蘭垞家玉岑作

玉照堂前三百梅鐵幹蚪枝僵且仆風流太守作替人
管領寒英莽無數紅椒青菽種成行地傍南湖枕女墻
割得王孫一區宅參差亭館接迴廊昔年我作津門客
幅幅畫梅張四壁梅花世界署門楣止渴真堪一笑啞
今朝叩戶看花來昨夢前塵忽喚回竹檻低回索花笑

花神應勸泛深杯夕陽斜射花光聳雅歌要為花榮寵

癸辛雜志載張功甫梅園有花榮寵六條其一則淡妝雅歌 簾底悠悠玉管吹屏彎

灑灑金樽涌當筵不醉是癡人况復傳柑值令辰一串

珠喉聲宛轉狂來那計吐花茵萬古遷移如轉轂難得

疎枝栽繞屋賞心樂事過眼空武林舊事載張功甫排

賞心樂事 肯負燒燈競絲竹白雲一隴翁不流豔雪千堆香

暗浮縞袂仙人我舊識花叢欲去又回頭

哀女孫

膝下羅女孫有女行在四扶床步伶仃問年纔及二學
語喚翁翁頗解老人意諸姑及伯姊珍惜靡不至誰教

失調護風脾不能治朝權一朝落繡祿空箱闕父母哭
號咷長幼紛涕泗我哀念骨肉情豈下殤異強言慰家
人空館獨垂淚

巡廊覓句失足仆地賦此自嘲

誤投瀨水孟東野踏翻醋甕王右丞莫笑阿儂吟太苦
要畱詩話後人增

阮溪圖爲唐靜含題

有序

靜含世居會稽阮溪五世祖遷杭沒皆反葬越中
靜含不忘首邱仍歸會稽卜宅郡城龍山之麓春
秋展墓往來阮溪因繪圖以識數典不忘之意云

錢塘洵美非吾土二頃歸營下溟田一權阮溪波滑笏
百年喬木認風烟

龍山原是小蓬萊手闢軒窗圖畫開午夜讀書聲不輟
頭龍季虎出羣材

昔年牀下拜龐公撰杖將車兩姓同重話弟兄存歿事
匆匆相對也成翁

樵風涇接石帆山寫入生綃想像閒

商寶意太守有樵風涇圖周石帆學

士有石帆別館圖子皆曾題詩

垂老尚貪山水窟乘風還擬共躋攀

項金門招遊湖上登六一泉後山寫望分賦

危亭幽敞散炎囂竹徑盤盤不憚遙遠艇似鳧翔水面

垂楊如幄接堤腰得逢佳士吟情健共掬清泉塵障消
斜日更尋孤嶼去好風吹送赤闌橋

病足止酒經旬復飲口占三絕

涼風吹送雨聲來欵脚空堂亦快哉莫信無稽老醫士
禁人酒醖不教開

越釀藏來說六年故人相餉早秋天色香味比楓亭荔
肯負今宵又損眠

手持犀舄製宣和也勝豪門金叵羅玉藕玲瓏蓮子嫩
侍兒休勸酌無多

送小谷入都赴四庫館

九重開玉府六合獻珠墳妙選娜嬛冊奇蒐委宛文光
搖藜閣杖香溢石渠芸

聖治超隆古儒臣爭策勳牙籤排甲乙寶笈整紛紜校
勘趨朝鼓傳鈔倚夕曛夫君富緇帙奕世代耕耘藥榜
書名可葵心向日愍川塗寧憚瘁鷓鳳許爲羣殘暑秋
帆去衰年惜袂分彙征逢盛典覽異得稀聞俊傑難棲
谷飛騰看躡雲豈徒工八法要使張三軍報最酬庸日
王言嘉乃勤

秋日泛湖過玉岑可莊

別墅俯湖岸日斜繫纜尋喜無多屋宇少陵幽在近山

林佳興自然得纖埃何處侵阿戎能醉我不惜過花斟
哭秋田

巫陽何地更招魂誅德平生可細論友愛無慚義門鄭
循良不讓道州元歸田樂事湖邊舫閉戶閒情花下樽
回首西風嘆陳迹傷心同輩幾人存

鄭半桐招同桐峯翟秬原集溯月軒

邴罷陶歸詎足嗟林亭新闢遠塵譁囊中尚貯驂鸞錄
堦畔新栽酈水花跋扈酒人無惡客紛綸經術舊傳家
寒宵莫下黃門淚萬事恒河劫裏沙

半桐時有悼亡之感

仲冬望後三日孫在鑒招同西林金門胡滄來

朱映辰集紫陽別墅分賦得吟字

紫陽山麓闢講舍醇儒接席教澤深猶憶橐筆少年日
樗櫟亦復廁鄧林飢來車脚轉萬里北走燕薊南桂柳
不殖而落學圃廢遄歸兩鬢吳霜侵良園無事閉門臥
摧絃不鼓昭文琴今晨欲雪天未雪凍雲匝地終朝陰
酒人有約起我痿瀛洲榭上重登臨延陵詩老謂西破
曉至喜魚同隊苔同岑蒼崖薜滑不敢上枯枝戰風驚
棲禽欄杆獨倚瞰碧沼汲古修綆違初心經義治事軌
範在秉燭光短愁勿禁羲輪太息挽莫反炙硯且作銷
寒吟

可莊八詠同願圃涑園百藥蘭垞松巖賦

結廬避俗喧愛茲孤山岑山冷道不孤寂寥抱冬心何

須王錄事持贈雙南金

裏湖草堂

不種東陵瓜不耘南山豆荷鋪帶月歸問君何所有掉

頭笑不言寒香落吾手

鋤月山房

春陰泥殺人簷外瀟瀟雨風寂雨聲稀風喧雨聲聚喧

寂久憺忘無心為迎拒

聽雨廊

如砥一片石移自奇章家都籃巧位置周遭繡苔花有

時隣僧過共喫趙州茶

煮茶坪

十笏淨無塵隔戶風嫋嫋幽篁不見天日影漏罅小何

當結夏過清涼謝物擾

檀樂小軒

花信第一風吹徹南枝白翠羽啼啾啁空亭淡將夕願

為十日畱莫遣飛成雪

初白亭

緬昔銅井遊忍寒一艇往香雪浩如海十載騁遐想老

結看花緣不勞打雙槳

梅花舫

長條胥衡門舒眼倦迎送下有春波蘸上有黃鸝唳誰

言碧無情心期來二仲

柳逕

春日述懷

歷錄勞薪萬里餘息機聊復閉門居老貪一樹梅花供

小園僅綠病入新年酒醖疎細雨濕簾春寂寂餘寒侵

木抄詩和 卷十四
被夢蘧蘧朝來事業真堪笑手整殘書驅蠹魚

得樹茅堂圖爲俞雪堂孝廉賦

一區之宅五柳巷左圖右書作屏障堂前老樹四五株
映日負風交俯仰達人得樹如得官日哦樹下忘哺餐
蘿垣蘚徑漫云陋胸次突兀廣厦寬記得過從六月夏
酒人轟飲午至夜披襟離立或離坐如水涼風樹頭瀉
豪門甲第高入雲洞房邃宇香氤氳不貯文史貯粉黛
屋隨人滅名不聞吾愛杜子美浣花草堂作詩壘又愛
盧鴻一草堂十志振彩筆君今三絕兼推工風流宛與
前賢同樹人樹德畫外意此圖襲藏垂無窮

忠天廟畫壁歌陸筱飲孝廉索題

我生未謁忠天廟陸子示我畫壁詩畫筆崢嶸出乃祖
清芬述德播誦之前有作歌鈍丁老和者長篇墨瀋隨
窮形極態恣刻畫讀詩如見畫壁奇中祀社神越公像
廟創何代傳異詞溯昔阿廢大業末羣雄擾攘干戈馳
我祖一劍起黟縣六州保障無瘡痍寶融抒忠洵不忝
錢俶效順嫌猶遲日月出矣燭火熄功在社稷銘鼎彝
能捍大災與大患祭法協禮僉曰宜急當買權北郭去
擷繁采藻陳清醑惟聞胸額半漫漶陳丹暗粉壁亦欹
畫壁有孫善表褻廟貌如故疇匡持揭虔妥靈後嗣責

卷還詩卷歌忸怩

正月十八日同王容大過忠天廟觀陸少微

畫壁

丁敬敬身

寒力入裘如入縞未遣梅花洗煩惱乍過收燈喜飽
晴日脚裂雲紅皓皓城北故人天機清有約靈祠事
幽討芍蘭兜西路不紆共曳青鞋踏霜草臨河廟榜
金慘淡肅奉社翁及社媪到門嘈噴匏竹驕叢簇村
巫炫虔禱進探佛屋闌檻冷畫壁模糊半傾倒三長
六法粗可辨陸瀚丹青藝林寶毘沙威神剩塔劫毘
首威儀失幢燾餘墨蕭瑟詎容識但見戈鋌雜箭筈

森然端麗五天女三日雙瞳猶炯好水衣風帶雖剝
落想見雲裳與霞襖再觀羅漢淡如夢彷彿兩軀疑
草稿流泐駸駸戴進亞若遇謝循應見媚陸翁斯地
舊廬在畫此定應增祓澡研青練紫自琢意豈惜役
思枯髓腦人生積善信有報俶儻佳孫盛文藻謂筱飲
四菩薩板記蘇公二行脚僧移米老惆悵今時妙賞
希空付庸僧支燠瀉世閒何者足堅牢萬物終傷難
自保蝸涎雀糞競相妬轉眼流光跡定掃平生搜奇
未肯後却恨來看知不早風前把茗漫徘徊流覽且
與開懷抱堂中大佛亦奇古戍削精嚴出誰造論工

寧下宋元世數百年經幾潤燥起尋碑讀稽時代久
仆泥沙供礪擣閑結游曹擬再過墨本壇椎庸一考

集王峩山瑞石山房同吳崑田廣堂敏叔暢月

書元作

燕筍登盤候江魚入饌時真成不速客來共判深卮洛

社風流在青松歲晚期獨憐未歸侶天末渺相思上湖客保

定金門客塞外

君家好兄弟宛有古人風會食多和樂聯床成老翁田
營十畝拙子課五經同聞道慚予晚微言藉啓蒙

謝諸蓀圃惠布

姚江沙地饒棉花大家小家勤紡車織成光明白氎布
雞鳴之匹不足誇我本菰蘆韋布士冬廼服段夏服紗
彼其不稱詩有刺曳裾隨俗恆愧嗟勞君持贈意良厚
還淳返樸離紛華菜根味香布衣煖逢掖之樂樂無涯
杜門著書守吾素青紫仕宦夫何加煩君更作九州被
天下寒士羣歡譁

童二樹畫梅歌

一樹梅花一放翁幻想幽情渭南伯畫梅萬幅詩萬首
二樹愛梅更入癖聞君訪古入大梁如雨聲華喧寓客
與酣落筆畫梅花墨汁淋漓驚創獲此圖畫意不畫形

擺脫凡庸成逸格枯根崛強閱千年老幹橫斜挺百尺
華光長老怖汗流煮石山農走辟易笑他鉤瓣與點椒
枉向人閒畱手迹我昔策杖元墓山香雪海中白雲白
又記放艇河渚西曉雨濕梅篷背滴而今老眼霧中看
我自負花花我惜如君肯寫一枝寄梅祖依然在素壁
何須繞屋三百株此身宛在巢居側

送何東甫赴福建錢嶼沙方伯幕

仙霞南去嶺嵯峨大好溪山紀舊過船放五篙爭竹箭
饌登三月剖香螺久傳阮瑀揮毫疾應識常何折節多
若續圖經成小紀興公遺籍待蒐羅

徐焞著有閩畫記
閩中海錯諸書櫟

園閩小紀
尚多未採

挽椒園廉使

高步金閨掇大科承

恩每賜對

鸞坡梧垣封事風裁峻海岱明刑愷澤多入座溫如古
玉罕相看癯似病維摩陳情樂遂蘭陔養束皙笙詩又
補歌

移家歲晚住錢塘栗杖篋輿逸興長著述續成經義考

君著有續
經義考

遊踪多在水雲鄉身騎箕尾悲難挽心戀觚

稜知不忘一卷粵遊詩覆瓿開雕愧費束脩羊

子粵遊
詩一集

木坊言利
卷一四
忝荷代刊於
眞州書院

哭堇浦

大雅遽彫謝儒林共失聲寢門爲一慟不獨故交情實
學崇師古英才樂獎成無人劉四恨眞率見平生
被

詔入京洛哀然舉制科狂言臣職負薄譴

聖恩多譔述盈緇帙栖遲息礪阿桂堂重步履觸緒涕
滂沱

傑氣凌霄漢鴻文邁等倫異才眞閒出高論必驚人舊

雨展良覲餘芳殿晚春

三月初十日峩山樸
完共集沈賡堂齋中

如何三月

別不復奉清塵

題辛夷花圖圖爲百藥所藏

輞川塢口一株斜曉雨含苞炫紫霞我老已無殘錦在
相看空羨筆生花

長至日奚星如招同陳象昭亦庭魏尚爵集翠

玲瓏山館分賦得漬字

胭脂九九圖消寒今日始吾曹際昇平嘉會修故事杯
斟缸面醖炭爇鳧藻熾羣賢少長集分箋競鼓吹高館
回春溫風竹舞晚翠半酣憶舊遊襟上酒痕漬驚心節
序移彈指存歿異諸老繼怛化客子仍憔悴

堇浦柳州
雲溪庚寅

夏五集 山館 聚散理本恒歡場轉隕涕庭前黃梅花繁葩挺古致不如且痛飲頽然泯憂喜隨時愛景光靜觀消長意

挽吳鷗亭

七十一年疾飛鳥才了十人百事了乘雲化鶴蓬瀛遊俯視塵寰枉膠擾平生結客擅風流戶外詩筒束筍收雅集玉山傳競美名薨百八鬪觥籌萬卷遺書富鄴架宋槧元雕見者訝丁卯舊集重購歸先公手澤難論價達人詎受世網牽杜門息影蹋脚眠晴几閒鈔樂志論夜燈時把悟真篇武林耆舊紛殘稿博訪旁求恣搜討

續成全帙有惠連

謂小

一郡人文永爲寶任黎誼篤締

朱陳貌敬心親五十春地下故人多地上山陽笛裏黯傷神

書巢篇爲晴江賦

讀書古稱佳貴在媚學子載籍雖極博根柢窮經始諸史鏡治亂子集多且旨三倉與四庫浩瀚莽無涖哲人領其要萬派流一揆夫君嗜緇帙焚膏夜繼晷冷官例食貧築室十畝裏桑葉綠映軒稻花香入屐牙籤環堵排南面百城侈直同飽字蠹亦似搬薑鼠往來鵲銜枝辛苦燕營壘杜門不出門著述積盈几遭逢

右文代遺書訪四氏近奉 諭旨命大吏購浙省錢塘小山堂趙氏秀水曝書亭朱氏

嘉興天籟閣項氏鄞縣天一閣范氏藏書鈔錄以進曷不獻所藏阿閣奮翅起

徒困鷓鴣棲素髮垂兩耳掉頭顧我笑兔園冊有幾脈

望不可期菟裘吾老矣

上巳後二日查香雨大令招集湖北漁莊泛舟

看桃花

也宜樓上一憑闌湖外青林林外山插脚紅塵緣底事

讓他鷗鷺十分閒

垂柳垂楊千萬條風光正逼賣餠簫老懷不減嬉春興

暗數佳名十二橋

回櫂漁莊日脚斜香分煎餅玉蘭花更期後會休輕別

燒筍朝餐夕鬪茶

陶峴三舟載客行雛伶一部囀春鶯清絲脆竹春愁滿

我久忘情驀有情

酒攜東浦瀉紅螺聽到低眉喚奈何病眼看花貪看近

不論花少與花多

孫新婦方孺人挽辭有序

孺人姓方氏錢塘明經同溪長女年十九歸同里

孫秀才誦芬結褵甫四旬遽以疾卒淑慎昭宣孝

聲無閒於兩姓其為女為婦之賢具載吾友杭堇

浦編脩小傳陳句山太僕厝銘中嗚呼蘭蕙芬銷
瑤琨光掩難覓稠桑之妙子更乏返魂之少君奉
倩神傷情增伉儷寧不悲哉誦芬來乞詩爲賦七

絕五首

綠窗塵闕謝華年鏡匣脂箱忽棄捐
息沒匆匆隨逝水月華不待兩回圓

尋思往事意難忘不比黃門賦悼亡
檢得釵頭茗親進也如洗手作羹湯

嚴家山畔一林松暮雨蕭蕭冷殯宮
營葬營齋宜早計莫教淺土弔秋蟲

由來腹痛少人知我爲荀郎進一詞
慈竹淚痕和露滴循陔休更過時悲

廿年前夢記依稀弱息難招環珮歸
子一女十不用阿銀犁苦憶彩雲容易碧天飛

題張樗園畫冊

古之純孝士愛親衷至誠手澤什襲藏寶護逾瓊瑛卓
哉樗園翁廣譽馳序鬻讀史舉其要讀經挾其精下筆
風雨驟纏纏千言成餘事寄圖繪才大不一名騰驤奮
遠志驅馬走春明簪毫入書局談笑折公卿京兆試再
蹶年矢捷飛星鶚薦掉頭謝將母急歸程春媚而冬愛

笙詩補由庚高才例轆軻五十駕雲輶庭前三珠樹上
 有烏夜鳴鬱攸何肆虐突如焚棟臺遺墨付劫灰無由
 訪零丁長公偶閱市一幀出敗簾熙筌妙蹟在喜極雙
 淚傾亟歸汶陽田遂返趙氏城裝潢傳孫子乞詩猶吞
 聲我欽孝思篤展讀心怛怛清芬述先德永言念所生
 緇素棄敝屣寧等蚩蚩氓

素山招遊靈隱得詩四章

姚侯雅嗜山招客作遨頭時維九月杪風日猶暄柔竹
 輿行軋軋佳處輒少畱蘆荻半未刈仄徑鳴颼颼紆迴
 轉數邨野色迎雙眸白雲翦前谷黃葉落斷流遠聞打

稻聲頗欣農有秋放懷入蓮社何用攢眉憂自茅家埠至靈隱道

中即日

到寺日影斜天半風鈴語梯枕百尺登攬身袂輕舉開
 窗納羣巒叢樹莽回互富覽霽塵顏憑虛久延佇微颼
 忽拂林悴葉紛墜渚老綠變焜黃驚心又易序靜觀榮
 枯理造化妙機杼耽幽憺忘歸目極飛鳥去華嚴閣寫望

貪遊不知疲莓磴下復升竹院徑幽邃屋架最上層導
 師引客入熒熒上佛燈門前五株松兩松久飛騰不知
 百年後人事幾廢興且飽伊蒲饌跌坐證三乘宵分空
 山寂竹籟靜可聽願言解塵網借緡貝葉經會宿松雷山房

不蹋韜光路迢遞俄八年幽境貯胸臆時夢凌其巔奔
泉勢噴雪密竹影蔽天樓頭瞰江湖鳥下盪雲烟邇來
古池上曾開幾金蓮蹇步阻咫尺無術學飛仙宛如三
神山欲近仍迴船一笑謝山靈卑棲吾自便

欲遊韜
光不果

素山集里中同康熙甲申生者桐峯摩村躋堂
柯山兄及予共六人宴於端華堂酒半出順治
元年所製銀杯命後甲申所誕哲嗣奉以壽客
肇舉齊年之會遠希會昌元豐諸老之高風甚
盛事也摩村斐然有作予續賡一章用以紀實
粉榆五老衡宇鄰步履過從不隔旬維予糠粃玷後塵

柯山居士齒冠倫一麾出守猶逡巡諸公袞袞佩印紳
甘棠之碑樹嶙峋政成遄歸狎釣輪宰官偶現遨頭身
比部心戀鶴髮親遺榮一疏蘭陔循暇續八社羅衆賓
登堂拜母展華茵小同揖客詞恂恂問年先後齊甲申
改席檠出鑿落銀紫芝煌煌爛若新開

國紀元第一春良工製巧銘雅馴觴行疾若下坂輪插
芳咀甘殽迭陳笑言和懌音叩鐔竹溪人物遜此辰方
今

聖治被八垠緬酋行見隸僕臣萬年有道頌

楓宸行慶施惠薄海均詠歌太平娛夕晨山屏水鏡湖

之濱復與栗杖莫憚頻歲寒令德保松筠嘉會勿替耄
耄臻

同作

姚遠翹 素山

熙朝至治百禩餘年和人壽樂里閭太平耆老日燕聚
往往晨夕鳴瓊琚況復

予歸

恩獨被閒居日侍慈顏喜同歌擊壤集嘉賓舊好新知
皆同里同里還教生亦同龐眉皓髮前賢風或辭圭
組身永逸或耽泉石情彌沖不才亦與後塵步雲鶴
羣中一野鷺問年旣得生齒齊古來嘉會今重遇艸

堂尊酒卜日開惠然勝侶欣同來嗜古何用癸乙占
侈陳不貴山雲壘舊藏紫芝銀鑿落穉兒擎出同年
籥捧卮行酒壽衆賓交歡一一當筵酌良工製就銘
詞新款識

天朝第一春入手摩抄傳祝遍先後推數三甲申藉茲
良會娛堂北板輿長奉躋壽域願歌君子頌樂胥此
讌綿綿無爽忒元豐同甲垂令名吳興六老餘光榮
今茲六老更同甲此事千古差難爭推厥由來歸

聖治耆英竚見人中瑞餘齒休教歲月催閒身盡出
君王賜自今遊屐聯芳蹤春花秋月頻過從吳山之顛

湖水曲襄羊樂志同扶筇風流尚可繼八社歌詠昇
平安綠野下里陳辭未足稱盛事差堪補風雅

陳 鏞 摩村

肇舉齊年會趨陪却杖隨數成竹溪逸義媿洛濱者
朏魄齒仍序闕逢歲不移維申還借嶽叶瑞已生芝
蘭室周旋久商山嘯咏遲祥金光有耀良冶製母歆
引滿觴爲政傳空酒弗辭漏遙覘蠟炬花落寘槃匝
珍味看頻進寒香果最宜心清譚愈穆興洽聽忘疲
蠲忿顏堪駐宜男晚更滋小同能揖客先後甲無岐
長至前一日同人集秋水堂預作開爐之會分

韻各賦五古二首得至字一字

羲輪不我停抹電七十四凋年急催人驚心逼長至偶
抱上氣疾畏風下帷避酒人隔巷招強赴小遊戲角勝
遞消長談諧泯嫌忌晴窗炙背暄巡廊一周視南枝萼
將圻短砌草猶翠生意愛盎然何用紅爐熾

今朝晷較短飯罷景西匿屏彎送酒觚同調促坐密華
燈四角垂光芒辟寒冽燠館卽在茲我醉每忘出齒鏗
嚼花糖手香搓蜜橘喧呼拋彩瓊琳瑯奮鴻筆爲樂戒
無荒剝復理則一明看祥雲書萬戶安且吉

同作得作字繪字

姚 珽 白河

冬晴日杲杲氣暄捲簾幕晝短興轉長廓處嫌索莫
 打門酒人來驚起樹頭鵲爾汝形久忘高談恣噉噉
 山茶豔吐花水仙香破萼徒倚共延賞翰墨亦閒作
 亞歲是明日炊黍換年籥為歡貴及時缸面酒頻酌
 萬寶已告成三時喜不害年豐穀價平茆簷飽粗糲
 入冬苦不雨郊原失沾漑宿麥連畦萎偃農交嘅
 彼蒼憫羣黎願飛雪片大積素封林巒民食庶有賴
 何須臙脂圖花戶炫藻繪

花朝日孫瑤圃招集凝和堂和金海住宗伯韻
 頌酒誰能學閉關招邀隔巷飲循環宮僚雅集杯同把

康熙閒湯潛菴沈繹堂郭快圃王吳廬耿逸菴田子湄
 張敦復李山公朱即山王阮亭諸公同官坊製銀杯
 十上鐫宮僚雅集四字內鐫飲者人名字號籍貫大戶
 為湯文正公小戶則阮亭司寇也瑤圃是日出此杯觴
 客
 洛社風流會可攀形迹久拋車笠外笑談不入市朝

閒米囊花好連畦種乘興還來飽看還

芹香筍嫩列駢筵入座洪厓笑拍肩圖畫無心傳異日
 鶯花過眼感流年閒情且逐苔邊杖塵事休論草節鉛
 計日清明連上巳勝遊何地不歡然

題桑東愚采藥圖

身體髮膚本父母全歸全受戒毀傷胡為手爪長咫尺
 勿觀審視驚非常先生讀書窮至理養爪渾同養性似

迎

鑿敷奏七萃前

顧問榮邀屬車止厥考孝勇翁至行上達

旌典崇難兄弢甫翁蔚然一代儒者宗門內得師世濟
美羣史紛綸是非剖却將餘事隱於醫妙手十全尠爲
耦有兒淡墨早書名挾藻摘華哲匠傾爲捧遺圖乞題
句依稀玉貌識平生吁嗟乎高人寓意在有無何必定
攜金鴉鉏古來那得不死藥唯有孝友文章與世相撐
扶

槐塘詩稿卷十四終

